

Leikhús – Leikhús – Leikhús – Leikhús – Leikhús

Frumskýning á Akureyri: Nú er það Kabarettinn

Söngleikurinn Kabarett verður frumsýndur hjá Leikfélagi Akureyrar annað kvöld, 14. mars, klukkan 20.30. Er þessi sýning í tilefni afmælis leikfélagsins um þessar mundir.

Sagan gerist í Berlín skömmu fyrir valdatöku nasista. Er þetta svo sannarlega söngleikur þar sem hlutirnir gerast hratt og er sá sami og kvikmyndaður var fyrir níu

árum þar og sló í gegn með Lizu Minnelli og Martin Gray í aðalhlutverkum.

Leikstjóri Kabarettis er Briet Héðinsdóttir en danshöfundur er Kenn Oldfield. Hljómsveitarstjóri er Roar Kvam. Leikmynd og búmerki eru eftir Karl Aspelund.

Margir leikarar koma fram í sýningunni en með helstu hlutverk í



Kabarettinum á Akureyri er spáð geysilegum vinsældum. Þetta er sannarlega söngleikur þar sem hlutirnir gerast hratt skömmu fyrir valdatöku nasista.

Kabarett fara Guðjón Pedersen, Ása Svavarsdóttir, Einar Jón Briem, Soffía Jakobsdóttir og Þrá-

inn Karlsson. Forseti Íslands, Vigdís Finnbogadóttir, verður viðstödd frum-

sýningununa og til stóð að fá Sverri Hermannsson menntamálaráðherra einnig til að koma.

Háskólabíó

Trúboðsstöðin (Mission) er ein þeirra kvikmynda sem tilnefnd er sem besta mynd við næstu óskarsverðlaunaafhendingu. Myndin er leikstýrð er af Roland Joffé sem síðast stjórnaði hinni rómuðu mynd The Killing Fields. Þess má geta að Trúboðsstöðin fékk verðlaun sem besta mynd á Cannes í fyrra. Trúboðsstöðin gerist á átjándu öld í Suður-Ameríku og fjallar aðallega um samskipti tveggja ólíkra manna, föður Gabriels, sem er kaþólskur prestur, og Mendoza, sem er þrælasali í byrjun myndarinnar. Flestir eru sammála um að Robert De Niro og Jeremy Irons sýni báðir stórgóðan leik í aðalhlutverkunum.

Bíóhúsið

Sjóræningjarnir (The Pirates) er gamaldags sjóræningjamynd með Walter Matthau í aðalhlutverki. Leikur hann gamlan sjóræningjaföringja sem lætur sér ekki allt fyrir brjósti brenna. Sjóræningjarnir voru óhemju dýr kvikmynd og til að mynda lét leikstjórinn Roman Polanski byggja sjóræningjaskip í fullri stærð og var enginn smákostnaður við það ævintýri. Tvennum sögum fer af gæðum hennar og sýnist sitt hverjum. Og nú er bara að sjá hvort Íslendingum líkar ævintýramynd Romans Polanski.

Bíóhöllin

Whoopi Goldberg er leikkona er

hlaut heimsfrægð fyrir leik sinni í Color Purple, dramatískri mynd sem Steven Spielberg stjórnaði. Goldberg er aðallega þekkt sem gamanleikkona og í nýjustu mynd sinni, Njósnaranum (Jumpin Jack Flash), sýnir hún hvað í henni býr í bitastæðu hlutverki fyrir gamanleikkonu. Af öðrum myndum í Bíóhöllinni má nefna úrvalshryllingsmyndina Fluguna (The Fly), mynd sem fær hárin til að rísa á höfði áhorfandans og Góða gæja (Tough Guys) þar sem gömlu brýnin Kirk Douglas og Burt Lancaster fara á kostum.

Stjörnubíó

Stattu með mér (Stand by Me) er nýjasta kvikmyndin gerð eftir ritverki Stephens King. Í þetta skiptið er það smásagan Líkið sem orðið hefur fyrir valinu. Fjallar hún um fjóra þrettán ára drengi sem fara í óvenjulega helgarferð. Tilgangurinn er að finna lík drengs sem hvarf. Leikstjóranum Rob Reiner tekst að gera virkilega huggulega kvikmynd úr litlum efnivið. Ekki skemmir fyrir góður leikur drengjanna fjögurra.

Tónabíó

Vítisbúðir (Hell Camp) er um hermenn í æfingabúðum og ævintýri þeirra. Aðalhlutverkin leika Tom Skeritt og Lisa Eichorn. Þetta er mynd fyrir þá sem láta sér nægja hasar án þess að efnisþráður skipti miklu.



Regnboginn

Hjartasár

Hjartasár (Heartburn) fjallar um Rachel og Mark, tvo blaðamenn sem kynnað í brúðkaupi. Þau fella hugi saman og þrætt fyrir að hvorugt trúi á hjónaband giftast þau, eignast barn og framtíðin virðist blasa við þeim. Það fer samt fyrir þeim eins og 60% hjóna í Bandaríkjunum, þau skilja eftir að Rachel kemst að því að Mark hefur haldið fram hjá henni.... Höfundur skáldrattsins og kvik-

myndahandritsins, Nora Ephron, byggir sögu sína á eigin æfi en hún var gift hinum fræga rannsóknarblaðamanni Carl Bernstein sem frægur var fyrir að koma upp Watergate hneykslinu á sínum tíma ásamt öðrum. Hjartasár er kvikmynd sem er eins og sköpuð fyrir tvo góða leikara og það færa þau sér í nyt Meryl Streep og Jack Nicholson.

Kvikmyndahús

Austurbæjarbíó

Myndir Andreis Konchalovsky eru svo sannarlega snemma á ferðinni hérlandis. Brostinn strengur (Duet for One) er alveg glæný. Fjallar myndin um fiðluleikara sem kemst að því að hrörnunarsjúkdómur muni brátt hindra hana í að leika á hljóðfæri sitt. Breytir þetta viðhorfi hennar til lífsins. Örvænting heltekur hana og verður til þess að hún gerir ýmsa hluti sem henni hefði aldrei dottið í hug að gera. Julie Andrews sýnir stórleik í hlutverki fiðluleikarans. Þá sýnir Austurbæjarbíó einnig mynd með kappanum Bud Spencer. Þeir sem ekki eru orðnir leiðir á honum fá væntanlega eitthvað fyrir aurana sína.

Laugarásbíó

Hollenski leikarinn Rutger Hau-er leikur aðalhlutverkið í spennu- myndinni Eftirlýstur lífs eða líðinn (Wanted Dead or Alive). Leikur hann þar mannaveiðara sem eltir uppi hryðjuverkamenn með góðum árangri. Þá má nefna að Laugarásbíó sýnir enn úrvalsmyndina Lagarefi (Legal Eagles) með úrvalsleikurunum Robert Redford og Debru Winger í aðalhlutverkum.

-HK

Sýningar

Gallerí Borg

v/Austurvöll

Þar stendur yfir sýning á verkum Hrings Jóhannessonar. Á sýningunni eru um 40 verk: olíumálverk, teikningar, pastelmyndir og litkrítarmyndir. Sýningin er opin virka daga kl. 10-18 nema mánudaga frá kl. 12-18 en um helgar frá kl. 14-18. Henni lýkur 17. mars.

Kjarvalsstaðir

við Miklatún

Þar stendur yfir skúlptúrsýning Hansínu Jensdóttur. Hún er gullsmíður að mennt og starfar hjá Jens Guðjónssyni gullsmíði. Hún stundaði nám við Myndlistar- og handíðaskóla Íslands og við Myndlistarskólann í Reykjavík og var einnig tvö ár í skúlptúrdeild SAIT í Calgary, Kanada. Hún hefur tekið þátt í fjölda samsýninga. Sýningin stendur til 29. mars. Í austursal verður opnuð á morgun samsýning Félags íslenskra myndlistarmanna og verður hún opin daglega kl. 14-22 til 29. mars.

Mokkakaffi,

Skólavörðustíg 3a

Um þessar mundir sýnir Þóra Sigurðardóttir 40 myndir á Mokka sem allar eru unnar á þessu og síðasta ári. Þóra stundaði nám við Myndlistar- og handíðaskóla Íslands og Myndlistarskólann í Reykjavík á árunum 1975-81.

Norræna húsið,

Hringbraut

Í anddyri hússins hefur verið opnuð sýning sem ber yfirskriftina Norrænar ljósmyndir '85. Á sýningunni er úrval mynda eftir ljósmyndara frá Íslandi, Danmörku, Finnlandi, Noregi og Svíþjóð. Markmiðið með sýningunni er að sýna listræna ljósmyndun frá sem flestum sjónarhornum og að styrkja stöðu ljósmyndalistarinnar með tilliti til annarra greina myndlistarinnar. Sýningin er opin á opnunartíma hússins kl. 9-19 alla daga nema sunnudaga kl. 12-19 til 23. mars. Á sunnudaginn verður opnuð í sýningarsölum sýning á málverkum norsku listamannanna Olavs Strømme og Björns Tufta og höggmyndum eftir Sigurð Guðmundsson. Sýningin verður opin daglega kl. 14-19 til 29. mars.

Listasafn ASÍ,

Grensásvegi 16

Ásgerður Búadóttir sýnir myndvefnað í Listasafni ASÍ. Á sýningunni eru verk frá liðlega síðustu tveimur árum. Síðast hélt hún einkasýningu á Kjarvalsstöðum 1984 en hefur hin síðari ár tekið þátt í ýmsum sýningum erlendis. Sýning Ásgerðar stendur til 15. mars og er opin daglega kl. 14-18, nema á sunnudögum kl. 14-22.

Listasafn Einars Jónssonar

við Njardargötu

er opið alla daga nema mánudaga frá kl. 13.30-16. Höggmyndagardurinn er opin daglega frá kl. 10-17.

Listasafn Háskóla Íslands

í Odda, nýja hugvísindahúsinu, er opið daglega kl. 13.30-17. Þar eru til sýnis 90 verk í eigu safnsins, aðallega eftir yngri listamenn þjóðarinnar. Aðgangur að safninu er ókeypis.

Listasafn Íslands

Þar stendur yfir yfirlitssýning á verkum Valtýs Péturssonar. Sýningin spannar all-

an listferil Valtýs, allt frá því að hann var við nám í Bandaríkjunum 1944-46 til verka frá þessu ári. Eru þar alls 127 verk, olíu- myndir, mósaik og gvassmyndir. Í tilefni sýningarinnar hefur verið gefin út vönduð sýningarskrá og litprentað plakát. Sýningin er opin virka daga frá kl. 13.30-18 en kl. 13.30-22 um helgar.

Myntsafn Seðlabanka og

Þjóðminjasafns,

Einholti 4.

Opið á sunnudögum kl. 14-16.

Nýlistasafnið,

Vatnsstíg 3b

Á morgun kl. 14 opnar Guðbergur Auðunsson 8. einkasýningu sína. Á sýningunni verða um tuttugu málverk, unnin á sl. fjórum árum. Meginuppistaða sýningarinnar eru verk byggð á Íslendingasögunum. Sýningin verður opin frá kl. 14-20 um helgar en kl. 16-20 virka daga.

Stofnun Árna Magnússonar

Handritasýning opin á þriðjudögum, fimmtudögum og laugardögum frá kl. 14-16.

Þjóðminjasafnið

Í Bogasal Þjóðminjasafnsins stendur yfir sýning á 32 vaxmyndum af þekktum mönnum, íslenskum og erlendum. Vaxmyndasafnið var fyrst opnað í húsakynnum Þjóðminjasafns 14. júlí 1951 og var það til sýnis í 20 ár, en síðan hafa myndirnar verið í geymslu. Vegna mikillar eftirspurnar hefur nú verið ákveðið að sýna vaxmyndasafnið um tíma. Vaxmyndirnar eru til sýnis á venjulegum opnunartíma Þjóðminjasafnsins, þ.e. þriðjudaga, fimmtudaga, laugardaga og sunnudaga kl. 13.30-16. Aðgangseyrir er kr. 50 en ókeypis fyrir börn og ellilífeyrisþega.

Sjóminjasafn Íslands,

Vesturgötu 8, Hafnarfirði

Opið þriðjudaga til sunnudaga kl. 14-18.

Sæðyrasafnið

Opið alla daga kl. 10-17.

Póst- og símaminjasafnið,

Austurgötu 11

Opið á sunnudögum og þriðjudögum kl. 15-18. Aðgangur ókeypis.